

je so 1. lětnik Časopisa na l. 1885 z nastawkami dr. Muki, dr. Pfula, Wjelana, Radyserba, Kósyka a redaktora, jako tež z wobrazom dotalneho stareho domu M. S., kotryž je k. wučer Knjez darmo narysował; 2. Předženak na l. 1886 wot fararja Rādy z pomocu kapłana Křižana a někotrych druhich; 3. Štyrihlósne spěwy wot K. A. Kocora. Knihownik k. seminarski wyšši wučer Fiedler rozpraji, zo je so wot jednotliwych dobroćerjow 34 čisłow do knihownje dariło, a wot towarstwow abo wustawkow 63. Potom wopowědaše k. Kapler, zo je ze składa wudał 5285 exemplarow Protyki, 429 Spěwneje radosće, 294 Trójnikow, 293 Bibl. stawiznow, 570 zešiwkow Časopisa (kotrehož čisła 1, 3, 12 a 53 wjacy na składze njejsu) atd. Pokładnik k. Mjerwa rozpołož, zo bě wob lěto 2413 hr. 72 p. dokhodow a 2364 hr. 33 p. wudawkow, tak zo ze zbytkom zamóženje knižneje pokładnicy 2893 hr. 33 p. wučinja. Pokładnica za twar domu ma 4075 hr. 29 p. Zarjadnik domu k. referendar Mütterlein dawa rozprawu, zo měješe dom 2097 hr. 59 p. dokhodow a 1694 hr. 4 p. wudawkow, tak zo bě čisteho wunoška 403 hr. 55 p. Na to slěduje rozprawa k. kantora Jordana wo delnjołužiskim wotrjedze M. S. Wo nowej Bartkowej čitancy za šule a wo jednanjach ze šulskim inspektorom přednošuje k. farař Imiš. Žadana swobodna wučerška konferenca njeje daloko docpěła; jenož w Khrósćicach su 13 wučerjo so jedynkróć zhromadźili. Po předstajenju přiwezachu so jako sobustawy: kk. stud. theol. Jakub Nowak z Kašec, stud. theol. Mikławš Jawork z Miłočic, farař Sella z Krebbe, stud. jur. Michał Cyž z Lipska, wučer N. Šořta z Kanec, stud. theol. Matej Handrik z Jamnoho, direktor Kotsmich z Wołomuca a diakon Matek z Kamjenca. Při namjetach žada k. farař Sella, zo by so wjacy knižkow za lud pisało a wudawało. Na to předsydstwo wotmołwja, zo je často hižo čestne myto za tajke knižki wupisowało, ale jenož wot k. Wehle rukopisy dostało, a wočakuje nětko rukopisy wosebje wot młodych duchownych a wučerjow. Tež přistaja k. farař Wařtař, zo lud wšelake dawno wudate knižki pilnje čita, štož so tež z tym dopokazuje, zo su někotre hač w třoch wudawkach wudate było. Tohorunja přispomina k. dr. Muka, zo je so w předsydstwje a na hłownych zhromadźiznach hižo často podobne napominanje na spisowarjow stało, na kotrychž wězo pilnu džěla-